

အသံအသံအသံ အသံအသံအသံ
အသံအသံအသံအသံအသံအသံ
အသံအသံအသံအသံအသံအသံ



AWIG-AWIG

DESA PAKRAMAN PADANG SAMBIAN

WARSA 2007

PIDAGING MAKA BANTANG

AWIG-AWIG DĒSA PAKRAMAN PADANG SAMBIAN

Nyāsa Dēsa Pakraman Padangsambian	pra	4
Murddha Citta	pra	5
Prathamas Sargah : Aran Lan Wewidangan		1
Dwitiyas Sargah : Petitis Lan Pamikukuh		2
Tritiyas Sargah : Sukerta Tata Pakraman		2
Palet 1. : Indik Krama		2
Palet 2. : Indik Prajuru Dēsa Pakraman		4
Palet 3. : Indik Majelis Paruman Krama		6
Palet 4. : Indik Paguyuban Dēsa Pakraman Padangsambian		7
Kaping 1. : Kertha Dēsa		7
Kaping 2. : Panurēksa Arta Brana Lan Pawangunan Dēsa Pakraman		8
Kaping 3. : Lembaga Perkrēditan Dēsa Pakraman		8
Kaping 4. : Pasar Dēsa Pakraman		9
Kaping 5. : Pacalang Dēsa Pakraman		9
Kaping 6. : Widya Sabha Dēsa Pakraman		10
Kaping 7. : Paruman Pinandita Dēsa Pakraman		10
Palet 5. : Indik Kulkul		10
Palet 6. : Indik Pasamuhan		11
Palet 7. : Indik Druên Dēsa Pakraman		12
Palet 8. : Indik Sukerta Pamitegep		13
Kaping 1. : Karang, Tegal Lan Carik		13
Kaping 2. : Pepayonan		14
Kaping 3. : Wewangunan		15
Kaping 4. : Wewalungan		15
Kaping 5. : Tata Cara Naban (Nuduk) Wewalungan		16

Kaping 6. : Indik Baya.....	16
Kaping 7. : Panyanggra.....	17
Caturthas Sargah : Sukerta Tata Parhyangan.....	17
Palet 1. : Indik Dewa Yajnya.....	17
Kaping 1.: Pikolih (Petias) Pamangku.....	19
Kaping 2. : Kasukertan Kahyangan.....	20
Palet 2. : Indik Rsi Yajnya.....	21
Palet 3. : Indik Pitra Yajnya.....	21
Palet 4. : Indik Manusa Yajnya.....	26
Palet 5. : Indik Butha Yajnya.....	27
Pañcamas Sargah : Sukerta Tata Pawongan.....	28
Palet 1. : Indik Pawiwahan.....	28
Palet 2. : Indik Nyapian.....	31
Palet 3. : Indik Sentana.....	33
Palet 4. : Indik Warisan.....	34
Sasṭhas Sargah : Wicara Lan Pamidanda.....	36
Palet 1. : Indik Wicara.....	36
Palet 2. : Indik Pamidanda.....	37
Saptamas Sargah : Nguwah-Nguwuhin Awig-Awig.....	37
Aṣṭamas Sargah : Samapta.....	38
Pamuput.....	40

NYĀSA DĒSA PAKRAMAN PADANGSAMBIAN



Teges Nyāsa

1. Bucu lima, nyihnayang Pancasila.
2. Guēt tepi sanē mawarna tiga (putih, selem, barak) nyinahang kawēntenan Dēsa Pakraman sanē nyungsung Kahyangan Tiga, linggih Ida Bhatara sanē maraga Brahma, Wisnu, Iswara.
3. Tamēng, pinaka sarana panabeng, warna selem nyihnayang kawibawan, warna putih nyihnayang kasucian.
4. Arug, pinaka sarana pawangunan, warna barak nyihnayang kapurusan. -
5. Kandik, pinaka sarana pawangunan, warna kuning nyihnayang kasujatian.
6. Pita mawarna kuning, pinaka sarana pangiket panunggilan pakahyunan.
7. Sesanti “Grāma Prabhā Dīrghāyusa” mateges : genah dēsa sanē prasida ngwerdiang kautaman kauripan sanē ajeg.
8. Dasar mawarna wilis, nyihnayang kawibuhan.

AWIG-AWIG
DĒSA PAKRAMAN PADANGSAMBIAN
MURDDHA CITTA

Om Awighnamastu nama siddham,

Malarapan asung kertha nugraha Ida Sanghyang Widhi Wasa ngwēntenang kahuripan sekala niskala ring bhuana agung saha bhuana alit. Manut dresta dēsanē wantah pawakan pasayuban krama dēsa rawuhing kulawarga pawongannya. Dēsanē kaanggehang bhuana agung, pawongannya soang-soang pinaka bhuana alit.

Sotaning bhuana agung, dēsanē wantah pawakan bhuana mahurip jangkep saha tri hita karana luiṛē :

- ha. Parhyangan, sahananing kahyangan panyiwian dēsa genah ngarcana Ida Sanghyang Parama Wisēsa maka jiwa dēsanē.
- na. Pawongan, krama saha warga dēsa maka sami mapawakan bayu pramana mawinan dēsanē sida molah maprawerti.
- ca. Palemahan, tanah kekuwuban dēsa sinanggeh stulan dēsanē.

Adung patemon bhuana kalih larapan santa jagadhita, sinanggeh murdhaning prayojana pangriptaning awig-awig dēsa pakraman ring pasēban mami krama dēsa pakraman, pinaka sepat siku-siku pamatut, wastu prasida prayojana mami kabēh prasama angidep muah amagehaken kadi linging awig-awig iki.

PRATHAMAS SARGAH
ARAN LAN WEWIDANGAN

Pawos 1

1. Dēsa pakraman puniki mawasta Dēsa Pakraman Padangsambian.
2. Jebar kekuwub wewidangannya nyatur dēsa :
 - ha. Sisi wētān Dēsa Pakraman Dēnpasar lan Dēsa Pakraman Ubung.
 - na. Sisi lor Dēsa Pakraman Sempidi.
 - ca. Sisi kulon Dēsa Pakraman Kerobokan, Padang Luwih lan Gaji.
 - ra. Sisi kidul Dēsa Pakraman Kerobokan.
3. Wewidangan palemahan dēsanē, kepah dados makudang-kudang banjar pakraman, luiṛē :
 1. Banjar Pakraman Tegalbuah Dalem.
 2. Banjar Pakraman Buana Kubu.
 3. Banjar Pakraman Buana Dēsa.
 4. Banjar Pakraman Buana Agung.
 5. Banjar Pakraman Balun.
 6. Banjar Pakraman Anyar.
 7. Banjar Pakraman Padangsambian.
 8. Banjar Pakraman Minggir.
 9. Banjar Pakraman Pagutan.
 10. Banjar Pakraman Batuparas.
 11. Banjar Pakraman Tegallinggah.
 12. Banjar Pakraman Batukandik.
 13. Banjar Pakraman Gunungsari.
 14. Banjar Pakraman Mertha Buana.

DWITĪYAS SARGAH
PETITIS LAN PAMIKUKUH

Pawos 2

1. Dēsa Pakraman Padangsambian puniki ngamanggehang pamikukuh makadi :
 - ha. Pancasila.
 - na. UUD Negara Rēpublik Indonēsia Warsa 1945.
 - ca. Nganutin peraturan perundang-undangan sanē ketah kamargiang.
 - ra. Tri Hita Karana manut tatwaning bhuana agung.

Pawos 3

1. Luir petitis Dēsa Pakraman Padangsambian :
 - ha. Mikukuhin miwah ngrajegang Sang Hyang Agama.
 - na. Nginggilang tata prawretining maagama.
 - ca. Ngrajegang kasukertan dēsa saha pawongannya sekala lawan niskala.
 - ra. Ngrajegang kasukertan saraja druēn dēsa miwah druēn pawongannya sami.

TRTĪYAS SARGAH
SUKERTA TATA PAKRAMAN

Palet 1

INDIK KRAMA

Pawos 4

Sanē kabawos krama dēsa pakraman :

1. Krama maagama Hindu sanē mipil ring dēsa pakraman Padangsambian.
2. Sajaba punika sinanggeh krama tamiu lan tamiu.

Pawos 5

Krama mipil Dēsa Pakraman wēnten kalih soroh :

1. Krama ngarep.
2. Krama balu.

Pawos 6

Indik krama tamiu lan tamiu kadabdab olih banjar pakraman soang-soang.

Pawos 7

Ngawit dados krama dēsa pakraman inggih punika ngawit katedunang dados krama banjar pakraman.

Pawos 8

Sahanan krama dēsa pakraman keni ayah-ayahan sakadi ring sor :

1. Krama ngarep keni ayah ngarep.
2. Krama balu keni ayah balu.

Pawos 9

Tetegenan krama dēsa pakraman sakadi ring sor :

1. Krama ngarep keni pepeson jangkep.
2. Krama balu keni pepeson saparo jangkep.
3. Krama sanē madruē pasayuban ring pura Kahyangan Dēsa, maweweh mareresik ring sajeroning pura.

Pawos 10

Petias (ulih-ulihan) krama dēsa pakraman sakadi ring sor :

1. Polih pasayuban Prajuru, ngamanggehang saluir petitis tur kabawosang saha katiwakang pamutus sahanan wicarannya.
2. Nyarengin Paruman Dēsa / Banjar saha wenang mastikayang pamutus.
3. Kēngin mapuangkid, nyuksukin lan mogpog.

Pawos 11

Wusan dados krama dēsa pakraman sakadi ring sor :

1. Sangkaning uwusan mipil ring Dēsa Pakraman Padangsambian.
2. Kararyanang olih Banjarnyanē.

Pawos 12

Krama dēsa sanē uwusan makrama dēsa pakraman saha sinalih tunggil kulawargannya ritatkala kapatian yēning nganggē sētra keni pananjung batu manut pararem.

Palet 2

INDIK PRAJURU DĒSA PAKRAMAN

Pawos 13

1. Dēsa Pakraman Padangsambian kaēnter olih Bandēsa (Kelihan Dēsa Pakraman).
2. Banjar kaēnter olih Kelihan Banjar.
3. Sahanan Kelihan patut mawiwit saking krama ngarep kaadegang malarapan pamilihan. Kaadegang masuē limang warsa, kangkat kaadegang malih tur patut madēwa saksi ring Pura Dēsa.
4. Tata cara ngadegang prajuru dēsa inucap :
 - ha. Bandēsa saha prajurunnya kapilih olih Majelis Paruman Krama, mawiwit saking krama sanē kasudi olih soang-soang banjar adiri, tur kangkat mawiwit saking siosan banjar.
 - na. Kelihan banjar kapilih olih paruman krama banjar.
 - ca. Tata cara ngadegang Bandēsa saha Prajuritnya kapidababin olih Majelis Paruman Krama.

Pawos 14

1. Kelihan Dēsa (Bandēsa) kasanggra olih :
 - ha. Pangliman (Patajuh) pinaka wakil Bandēsa, manut kawigunannya.
 - na. Panyarikan pinaka juru surat.

- ca. Sedahan (Patengen) pinaka pangemit druèn dēsa.
 - ra. Kelihan Banjar pinaka rēncang Bandēsa ring soang-soang banjar.
2. Kelihan Banjar kasanggra olih :
- ha. Pangliman (Patajuh).
 - na. Panyarikan.
 - ca. Patengen.
 - ra. Kasinoman.
3. Sajeroning ngēnterang kasukertan niskala, Bandēsa mingsinggihang Pamangku Kahyangan Dēsa miwah para pinandita siosan.

Pawos 15

Swadharmaning prajuru dēsa luiṛē :

1. Ngēnterang pamargin sadaging awig-awig, paswara miwah pararem krama dēsa.
2. Nuntun saha nyaksinin tata cara miwah sangaskaraning kauripan sanē kaping ajeng ngilikang sulur pakulawargan.
3. Maka duta dēsa pacang matemu wirasa ring sapasira ugi.
4. Mawosang utawi niwakang pamutus marep ring wicara warga dēsanē.
5. Patut mapiuning sahananing pamargi swarencana dēsa sanē kalaksanayang a warsa ring pasamuhan Majelis Paruman Krama.

Pawos 16

Petias utawi ulih-ulihan Prajuru Dēsa Pakraman inggih punika luput pepeson ring dēsa.

Pawos 17

1. Prajuru dēsa pakraman kararyanang malarapan antuk :
 - ha. Sēda.
 - na. Pinunasnya.

- ca. Kanorayang olih Majelis Paruman Krama, riantukan sampun janten ngwetuang biuta.
2. Ngraryanang / nganorayang prajuru mangda ring sajeroning pasamuhan Majelis Paruman Krama, katumusang ring prajuru Dēsa lan Prajuru Banjar soang-soang.

Palet 3

INDIK MAJELIS PARUMAN KRAMA

Pawos 18

1. Majelis Paruman Krama inggih punika lingga pamurtining krama Dēsa Pakraman Padangsambian, maserana antuk para walinnya, sanē kasungkemin ngupadi karajegan petitis lan pamikukuh Dēsa Pakraman Padangsambian.
2. Majelis Paruman Krama mawiwit saking :
 - ha. Wali soang-soang banjar, sawilang 50 (sēket) diri polih wali adiri.
 - na. Wali saking seka teruna (daha teruna) soang-soang banjar adiri.
3. Majelis Paruman Krama kaēnter olih Prajuru Majelis tur karincik sakadi ring sor puniki :
 - ha. Kelihan Majelis.
 - na. Pangliman (Patajuh) manut kawigunannyanē.
 - ca. Panyarikan lan Wakilnya.

Siosan ring punika, majelis kepah dados tigang tēmpēk inggih punika :

 - ha. Widang sukerta tata agama.
 - na. Widang sukerta tata pakraman.
 - ca. Widang sukerta tata pawongan.

Soang-soang tēmpēkan kapucukin olih Wakil Kelihan Majelis adiri.
3. Swadharmaning Majelis Paruman Krama luiṛē :
 - ha. Ngadegang lan ngraryanang Kelihan Dēsa (Bandēsa) lan Prajuru Dēsa patut nganutin dudonannya.
 - na. Nglimbakang sahananing pamutus ring sakancan krama dēsa.
 - ca. Midabdabin rencana pawangunan dēsa.

- ra. Prajuru Majelis Paruman Krama kaadegang olih paruman majelis masuē limang warsa, kangkat kaadegang malih.
- ka. Wenang nguwah-nguwuhin awig-awig Dēsa Pakraman.
- da. Mratyaksayang sapari lampah prajuru dēsa, ring sajeroning ngamargiang swadharmannya
- ta. Ngwēntenang pasamuhan manut kawigunannya, sanistanē limang warsa apisan.
- sa. Nibakang sakaluir dharma tetimbang lan pituduh sanē patut kamargiang olih prajuru dēsa.
- wa. Sahananing pamutus malarapan antuk gilik saguluk, bilih tan prasida swara sanē makēhan sinanggeh pamutus.
- la. Majelis Paruman Krama pastika wenang ngamargiang swadharmannya, patut madēwa saksi ring Pura Dēsa.

Palet 4

INDIK PAGUYUBAN DĒSA PAKRAMAN PADANGSAMBIAN

Kaping 1

KERTHA DĒSA

Pawos 19

1. Kertha Dēsa mawiwit saking :

- ha. Prajuru Kertha Dēsa makuēhnyanē pitung (7) diri mawiwit saking krama dēsa sanē tatas uning ring niti (hukum), daging awig-awig dēsanē saha rasa tetimbang (panglokika).
- na. Prajuru Kertha Dēsa kapucukin olih Bandēsa.
- ca. Prajuru Kertha Dēsa kaadegang miwah karayanang olih Bandēsa nyabran limang warsa salantur ipun kangkat malih sanē kasungkemin olih Majelis Paruman Krama.

Pawos 20

2. Swadharmaning Prajuru Kertha Dēsa luiṛē :

- ha. Muputang indik wicara sanē metu ring sajeroning dēsa pakraman.

na. Ring sajeroning muputang indik wicara, wenang :

- (1). Mupulang rincikan wicara.
- (2). Nedunin sapisira sanē kasengguh miwah sanē kabuatang.
- (3). Nglaksanayang paruman sapani indik ngingkupang wicara.
- (4). Bilih tan prasida ingkup, wicara inucap kaatur ring Paruman Majelis Krama.
- (5). Ngamedalang pamutus.
- (6). Saluir pamutus sanē kamedalang olih Kerta Dēsa, kasukserah ring Bandēsa mangda kalaksanayang.

Pawos 21

Kaping 2

PANURĒKSA ARTA BRANA LAN PAWANGUNAN DĒSA PAKRAMAN

- ha. Prajuru Panurēksa Arta Brana lan Pawangunan Dēsa Pakraman kasudi lan kaadegang olih Bandēsa nyabran limang warsa, kangkat kaadegang malih, sanē kasungkemin olih Majelis Paruman Krama.
- na. Swadharmaning Prajuru Panurēksa Arta Brana lan Pawangunan Dēsa Pakraman inggih punika nurēksain sahananing arta brana lan pawangunan dēsa, saha nguningayang pikoli panurēksannya majeng ring Bandēsa.
- ca. Prajuru Panurēksa Arta Brana lan Pawangunan Dēsa Pakraman katahnyanē manut kawigunannya.
- ra. Sajeroning ngamargiang swadharmaning panurēksa olih Prajuru Panureksa Arta Brana lan Pawangunan Dēsa Pakraman patut kasarengin olih Badan Pengawas Lembaga Perkréditan Dēsa Pakraman.

Pawos 22

Kaping 3

LEMBAGA PERKRĒDITAN DĒSA PAKRAMAN

- ha. Prajuru LPD kaadegang olih Bandēsa nyabran 4 warsa, kangkat kaadegang malih sanē kasungkemin olih Majelis Paruman Krama.

- na. Swadharmaning prajuru LPD patut mapiuning ring Bandēsa.
- ca. Sahanan swadharmaning prajuru LPD patut polih panurēksan saking panurēksa (Badan Pengawas) LPD, sanē kasudi lan kaadegang olih Bandēsa nyabran 4 warsa, tur kangkat kaadegang malih sanē kasungkemin olih Majelis Paruman Krama.

Pawos 23

Kaping 4

PASAR DĒSA PAKRAMAN

- ha. Prajuru pasar kaadegang olih Bandēsa nyabran 4 warsa, kangkat kaadegang malih sanē kasungkemin olih Majelis Paruman Krama.
- na. Swadharmaning prajuru pasar patut mapiuning ring Bandēsa.

Pawos 24

Kaping 5

PACALANG DĒSA PAKRAMAN

- ha. Pacalang Dēsa Pakraman mawiwit saking soang-soang banjar pakraman.
- na. Pacalang Dēsa Pakraman saking soang-soang banjar pakraman kalih diri nyantos petang diri, manut katah krama banjarnyanē.
- ca. Swadharmaning Pacalang Dēsa pinaka pangemit kasukertan dēsanē.
- ra. Pacalang Dēsa Pakraman kaēnter olih Kelihan Pacalang tur kasanggra olih Pangliman (Patajuh), Panyarikan lan Patengen.
- ka. Prajuru Pacalang Dēsa kaadegang nyabran 5 warsa olih Bandēsa, kangkat kaadegang malih sanē kasungkemin olih Majelis Paruman Krama.

WIDYA SABHA DĒSA PAKRAMAN

- ha. Prajuru Widya Sabha Dēsa Pakraman mawiwit saking krama dēsa, sanē kaadegang nyabran 5 warsa olih Bandēsa, kangkat kaadegang malih sanē kasungkemin oilh Majelis Paruman Krama.
- na. Widya Sabha Dēsa Pakraman kaēnter olih Kelihan, Panyarikan, Patengen miwah Pasayahan.
- ca. Swadharmaning Prajuru Widya Sabha Dēsa Pakraman patut nuntun pasantian, sanggar tari muah sanggar tabuh ring soang-soang banjar pakraman.

PARUMAN PINANDITA DĒSA PAKRAMAN

- ha. Paruman pinandita mawiwit saking para pamangku Kahyangan Dēsa, pamangku pamrajan / pura paibon, dalang, balian usadha, balian sontēng, lan tukang banten sanē sampun kasurat ring Dēsa Pakraman.
- na. Paruman Pinandita kaēnter olih Kelihan, kasanggra olih Pangliman (Patajuh) lan Panyarikan, sanē kaadegang nyabran limang warsa olih Bandēsa, kangkat kaadegang malih sanē kasungkemin olih Majelis Paruman Krama.
- ca. Swadharmaning Prajuru Paruman Pinandita pinaka panyanding Prajuru Dēsa, niwakang tetimbang rikala nglaksanayang panca yajnya.

INDIK KULKUL

- 1. Kulkul ring Dēsa Pakraman Padangsambian wēnten :

ha. Kulkul Dēsa magenah ring Pura Dēsa.

- na. Kulkul Banjar magenah ring banjar soang-soang.
- ca. Muah Kulkul sanē siosan imagenah ring dēsa pakraman.
- 2. Tabuh tetepakan kulkul Dēsa / Banjar muah sanē siosan manut tetuludan luiṛē :
 - ha. Tengeran parum, tedun ngayah, suaran kulkul dabdab.
 - na. Tengeran wali, ngawit puja astawa sira mangku, taler rikala ngrupuk, suaran kulkul nungtit.
 - ca. Tengeran kapanca baya, suaran kulkul :
 - (1). Jiwa baya lan angga baya suaran kulkul bulus.
 - (2). Geni baya, ēr baya lan dana baya suaran kulkul bulus matuludan.
 - (3). Rikala linuh suaran kulkul ngempang.
- 3. Tengeran sinalih tunggil krama dēsa wēnten sēda, tabuh kulkul nungkak.

Pawos 28

1. Kulkul Dēsa / Banjar muah sanē siosan tan wenang katepak yēning tan sangkaning pituduh prajuru, sajawaning tetengeran kapanca baya.
2. Sang nepak tan sangkaning pituduh prajuru, patut digelis atur supēksa makabuatan panepakannya, yan tan asapunika keni danda manut pararem.
3. Pradē wēnten nepak kulkul manut tetengeran panca baya, mawastu ngamedalang krama, kasujatinnya tan wēnten panca baya, wenang sang nepak kadanda manut pararem.
4. Sahanan kulkul ring sawewidangan Dēsa Pakraman Padangsambian, wenang katepak ritakala silih tunggil kulkul banjar sajeroning Dēsa Pakraman Padangsambian, nyihnayang wēnten panca baya.

Palet 6

INDIK PASAMUHAN

Pawos 29

Pasa nuhan ring Dēsa Pakraman Padangsambian wēnten :

1. Pasamuhan Majelis Paruman Krama.

2. Pasamuhan Prajuru Dēsa.
3. Pasamuhan Panurēksa Arta Brana lan Pawangunan Dēsa Pakraman.
4. Pasamuhan Kertha Dēsa.
5. Pasamuhan Paruman Pinandita.
6. Pasamuhan Widya Sabha Dēsa.
7. Pasamuhan Pacalang Dēsa.
8. Pasamuhan Banjar Pakraman.
9. Pasamuhan Seka Teruna.

Pawos 30

Tetujon pasamuhan luiṛē :

1. Ngrencanayang wewangunan miwah sanē siosan manut kawigunannya.
2. Nyinahang pamargi sanē sampun kamargiang.
3. Mawosang wicara lan karya sanē mabuat, sanē digelis patut polih pamutus.

Palet 7

INDIK DRUĒN DĒSA PAKRAMAN

Pawos 31

1. Sanē sinanggeh druĒn Dēsa Pakraman Padangsambian kadi ring sor :
 - ha. Kahyangan Dēsa saha palemahannya.
 - na. Sētra utawi tunon.
 - ca. Sawah saha tegalan.
 - ra. Pasar.
 - ka. Lembaga Perkrēditan Dēsa.
 - da. Utsaha sanē siosan.
2. Sahanan druĒn dēsa pakraman sanē kakēsahang kawēntenannya (pengalihan hak) patut manut kaputusan pasamuhan dēsa.

Palet 8

INDIK SUKERTA PAMITEGEP

Kaping 1

KARANG, TEGAL LAN CARIK

Pawos 32

1. Sahanan karang paumahan patut :
 - ha. Pastika wēnten wates ipun, mahuluan kalēr miwah wetan.
 - na. Mapamedal karurung utawi marginē tan wēnten kabebeng.
 - ca. Ngardinin kaasrian karang miwah tlajakan.
2. Prajuru Dēsa Pakraman patut ngutsahayang mangda sami karangē punika kawēntenannya sakadi ring ajeng, nēnten wēnten kabebeng.

Pawos 33

Carik patut magaleng katebēn, tegesnya bates sisi kulon miwah kidul patut kakaryanang olih sang madruē carik.

Pawos 34

1. Sahanan krama dēsa pakraman patut ngwatesin karangnyanē soang-soang jantos sida trepti nyatur linggih.
2. Wates karangē sanē majapitan / masanding, patut kategen olih kramanē sanē mahuluan kawates.

Pawos 35

Krama dēsa pakraman tan kalugra :

1. Nglahlah karang tanah palaba pura, margi, tegal, tanah tegak kahyangan, sētra miwah carik.
2. Nanem utawi nunjel sawa miwah awak-awakan sawa, ring karang paumahan.

3. Makta utawi ngenahang barang sanē ngletelin sajeroning dēsa pakraman.
4. Ngembahang toya wit saking badan wewalungan, pasiraman, kakus, pawaregan, ka pakarangan pisaga miwah marginē.
5. Ngentungan wangkēn wewalungan ka tukadē utawi ka pakarangan pisaga. Mangda nanem wangkē inucap ring genahē sanē patut.
6. Pradē wēnten sakadi ring ajeng (angka 1 rawuh angka 4), keni danda manut pararem.

Kaping 2

PEPAYONAN

Pawos 36

1. Ngawit nanem pepayonan patut adepa agung (2,5 meter) ngajeroang saking wates.
2. Wit taru tan kalugra :
 - ha. Mentik sajeroning wates.
 - na. Nglintangin wates, bilih-bilih mawastu naoin miwah mayanin pisaga.
3. Pradē wēnten sakadi angka 2.ha lan 2.na ring ajeng kēngin kawarah olih panyanding, tur kasadokang ring Prajuru Dēsa, mangda mituduhin ring sang nruēang wit, ngebah taru inucap.
 Yēning ping tiga sampun kawangsit olih prajuru, taler durung karebah, kēngin sang nyaduang ngrebah taru inucap kasaksinin olih prajuru tur pinara tiga, asiki katur ring prajuru, asiki ring sang madruē wates lan asiki ring sang ngebah.
4. Pradē wēnten sinanggeh mayanin, sang kajerihin patut atur supēksa ring prajuru dēsa. Tur risampun kaparitatās, mituduhin sang nruēang wit mangda ngrebah.
5. Sang nruēnang miwah sang notor wit / pepayon sanē sinanggeh mayanin, dipradēnē pungkut nyantos ngrubuhin wewangunan krama / jadma siosan, patut ngamecikang wewangunan inucap, lan ngaryanin panyangaskarannya, sanistanē prayascita jangkep.

WEWANGUNAN

Pawos 37

1. Wewangunan pinih becik :
 - ha. Nganggēn asta bumi miwah gegulak asta kosala kosali.
 - na. Tan yogya nyayubin ka pisaga.
2. Pradē nēnten manut sakadi angka 1.na ring ajeng, risampunē kasadokang ring prajuru dēsa keni danda manut pararem.
3. Pradē ngwangun ring tepi siringing wates, patut ngwēntenang paigum ring pangadinnya, tur masadok ring prajuru.

Yan mamurug, riwekas pradē kawarah olih pangadinnya, wenang wewangunan inucap kagubar, saha tan polih kapocolan.

WEWALUNGAN

Pawos 38

1. Krama dēsa pakraman sanē miara sakaluir wewalungan, patut sayaga negul utawi makarya bada, mangda tan ngrusak karang utawi paabian krama sios, bilih-bilih jantos ngranjing utawi ngletehin Kahyangan.
2. Pradē nēnten manut sakadi ring ajeng, patut masadok ring sang madruē wewalungan, nglantur nyadokang ring prajuru, mangda katiwakin pamidanda sakadi ring sor :
 - ha. Ngwaliang wit sanē karusak, miwah prabia kapocolan yēning wewalungannya punika nyantos ngrusak tetanduran.
 - na. Panyangaskaran manut kaletelhannya.

1. Tan wenang ngangon ring :
 - ha. Palemahan kahyangan.
 - na. Pundukan sanē wēnten tetanduran.
 - ca. Tegal pabianan jadmā sios.
2. Pradē piwal sakadi inucap ring ajeng, kadanda manut **pararem**, saha maduluran antuk panyangaskaran, pradē ngangon ring kahyangan.

Kaping 5

TATA CARA NABAN (NUDUK) WEWALUNGAN

Pawos 40

1. Sapasira ugi polih naban wewalungan patut :
 - ha. Masadok ring prajuru.
 - na. Miara wewalungan inucap sapatut ipun.
 - ca. Yah mamurug sakadi angka ha, na inucap tan polih prabia saking sang madruē wewalungan.
2. Sang madruē wewalungan ical patut :
 - ha. Naur prabia ring sang sanē polih naban, agengnyanē manut panglokika prajuru.
 - na. Sang madruē wewalungan ical patut masadok ring prajuru.
3. Sasampunē asasih taler tan wēnten sanē mariangken, wewalungan punika dados kadruē olih sang naban.

Kaping 6

INDIK BAYA

Pawos 41

1. Pari indik baya wēnten bacakan panca baya luiṛē :
 - ha. Dura cara ring agama.
 - na. Jiwa baya makadi : kabaak, kapēt patinnya, ngamuk lan mlegandang.

- ca. Arta baya : kamalingan.
 - ra. Geni baya : kapuunan.
 - ka. Ēr baya : blabar ageng sanē nganyudang.
2. Sang manggihin panca baya patut nepak kulkul :
 - ha. Dura cara ring agama, jiwa baya, lan arta baya tetabuhan kulkul bulus nerus.
 - na. Geni baya lan ēr baya tata tetabuhan kulkul bulus mapaletan.
 3. Salantur, ipun sang keni kapanca baya, patut masadok ring prajuru dēsa utawi ring guru wisēsa, malarapan pasadok inucap, prajuru dēsa patut niwakang pamutus.

Kaping 7

PANYANGGRA

Pawos 42

1. Rikala ngwangun yajnya suka / duka, kēngin nunas panyanggra banjar manut ring banjarnya soang-soang.
2. Panyanggra banjar sanē kamargiang, manut dresta miwah pararem banjarnya soang-soang.

CATURTHAS SARGAH

SUKERTA TATA PARHYANGAN

Palet 1

INDIK DĒWA YAJNYA

Pawos 43

1. Palinggih panyiwian sawewidangan Dēsa Pakraman Padangsambian luiṛē :
 - ha. Kahyangan Tiga luiṛē : Pura Dēsa, Pura Puseh lan Pura Dalem Kahyangan. Pura Dalem Kahyangan madruē Prajapati ring sētra Agung, sētra Tegalbuah Dalem, sētra Tegal Linggah lan sētra Banjar Pakraman Pagutan lan Batuparas.
 - na. Pura Dang Kahyangan : Pura Tabeng.
 - ca. Pura Dadia / Paibon / Pamrajan soang-soang krama.

2. Rahina patirtan soang-soang kahyangan inucap :

- ha. Pura Dēsa lan Puseh sawusan patirtan ring Pura Luwur Uluwatu nemoning Purnama ring Pasahē, Pangelong Pisan utawi Pindo wenang kamargiang.
- na. Pura Dalem Kahyangan ring Saniscara Kliwon Wayang.
- ca. Pura Tabeng ring Buda Umanis Tambir.
- ra. Piodalan ring Prajapati :
 - ❖ Prajapati sētra Tegal Linggah : Budha Kliwon Pahang.
 - ❖ Prajapati Banjar Pakraman Pagutan lan Batuparas : Saniscara Kliwon Kuningan.
 - ❖ Prajapati Banjar Pakraman Tegalbuah Dalem : Saniscara Kliwon Wayang.

3. Pangaci ring pura-pura inucap kamargiang olih pamangku.

Pawos 44

1. Ring soang-soang pura inucap ring ajeng kawēntenang pamangku.
2. Ngadegang pamangku manut dudonan :
 - ha. Nyanjan (nunas pawuwus Ida Sang Hyang Widhi Waca).
 - na. Warisan pamangku.
 - ca. Kasudi olih krama.
3. Sanē tan wenang anggēn pamangku :
 - ha. Cēda angga.
 - na. Cēda pramana.
 - ca. Kageringan.
 - ra. Miwah sanē corah.
4. Prabia ngadegang pamangku lanang istri kamedalang olih krama.
5. Pradē wēnten pamangku sanē sēda, wēnten wantuan saking dēsa pakraman.

1. Swadharmaning pamangku :
 - ha. Ngēnterang upacara ring pura.
 - na. Ngaturang panauran-panauran sinalih tunggil krama.
 - ca. Mareresik lan nuntun kasucian kahyangan.
2. Sang mapanauran patut masadok ring prajuru mangda kailikitayang tur kaungguhang druēn dēsa luiṛē :
 - ha. Panaurah marupa wewalian (balih-balihan).
 - na. Panauran leluwes, mulē-mulē.
 - ca. Sesari.
 - ra. Sajawaning panauran sakadi inucap ring ajeng, sanē dados mawali kalungsur kēngin kapuput olih pamangku kēmawon.
3. Ngēnterang yajnya madia bilih-bilih mautama, kēngin nuwur Padanda kasanggra olili pamangku.

Kaping 1

PIKOLIH (PETIAS) PAMANGKU

1. Sarin canang, sarin panauran.
2. Luput ayah lan pepeson ring dēsa.

1. Pamangku kararyanang riantukan :
 - ha. Sēda.
 - na. Pinunas ngraga.
 - ca. Kararyanang riantukan nilar sesana swadharmaning pamangku.

2. Pradē kacihnan pamangku sanē sampun marabian ngalap rabi malih, patut mararyan awarsa tur patut malih ngamargiang pawintenan, wawu dados malih ngamargiang yajnya.
3. Pradē kacihnan pamangku balu ngalap rabi malih, patut ngamargiang pawintenan malih tur wawu dados malih ngamargiang yajnya.

Pawos 48

1. Piodalan ring Kahyangan Dēsa kasanggra olih banjar manut gilirannya.
2. Krama banjar siosan patut ngrawuhin ngaturang pangubakti, sanistanē soang-soang krama ngaturang sodan, canang asebit sari.

Kaping 2

KASUKERTAN KAHYANGAN

Pawos 49

1. Tan kalugra ngranjing ka pura :
 - ha. Sanē wēnten ring sajeroning kacuntakan.
 - na. Makta sahananing barang sanē sinanggeh ngletehin.
 - ca. Sato agung sawawaning mapepada.
 - ra. Nyusuin.
 - ka. Cēda Pramana.
2. Parilaksana tan wenang ring pura :
 - ha. Masumpah anayub cor sawawaning pituduh prajuru.
 - na. Ujar ala, masanggama makolem dados asiki lanang istri, mabacin lan sanē siosan sanē sinanggeh ngletehin.
 - ca. Mungguh tedun palinggih, sawawaning pituduh prajuru.
3. Sang amurug kecaping angka 1 (ha, na, ra, ka) saha angka 2 (ha, na) ring ajeng kadanda manut pararem.
4. Yan wēnten jadma karawuhan ring pura pradē ngatonin jadma sios patut ngupacara manut indik.

5. Sajawaning ilēn-ilēn yajnya tan kalugra kawēntenang sajeroning pura minekadi :
palalian, tajēn, dagang lan sanē siosan.
6. Pradē kahyangan katibēn durmanggala, pamangku patut digelis masadok ring
prajuru, mangda kaupacarain manut indik.

Palet 2

INDIK RSI YAJNYA

Pawos 50

1. Sang pacang mapudgala (dwijati), patut masadok ring prajuru dēsa.
2. Prajuru patut sareng nurēksa nitēnin mangda sulur kalih pamargi jat, manut
kecaping agama, makadi kacēda anggan, saha nyaksinin upacara / upakarannya.
3. Sapuputē, risampun sang nabē mapaica parab ring sang diniksan, prajuru patut
digelis ngilikitayang tur nyiarang ring paruman dēsa.

Pawos 51

1. Sajawaning pamangku sang pacang mawinten, maka buatan pacang mamargi
nyontēng, dalang, sakaluir ngēnterang karya (yajnya), patut masadok ring prajuru
dēsa.
2. Prajuru patut ngawas nitēnin tur wenang mialangin, pradē macihna sasar ring
kecap miwah dresta, tur sareng nyaksinin upacara miwah salanturipun nyiarang
ring paruman dēsa, tegap rawuhing wates kawenangan pangēnter yajnyanē.

Palet 3

INDIK PITRA YAJNYA

Pawos 52

Pamargi pitra yajnya madudonan manut ring sor :

1. Mendem utawi ngeseng sawa makacihna pakingsan ring Ibu Pertiwi utawi ring
Bhatara Brahma, salami nuptupang prabia.

2. Atiwa-tiwa utawi pangabēnan, sanē kēngin kaabēnang risampun ketus untu, yan dērēng ketus untu patut nglungah.

Pawos 53

Mungguing pamargin upacaraṇe mapendem patut nganggēn gegumuk utawi ngancak saji.

Pawos 54

Pamendeman patut sakadi ring sor :

1. Nganutin dēwasa.
2. Tan kalugra mendem :
 - ha. Rikala Purnama, Tilem, Budha Kliwon, Kajeng Kliwon, Tumpek, Anggara Kasih, Pasah, Prawani, Semut Sadulur, Kala Gotongan, Was Pangantēn muah Catus Pamanggahan, sadērēng engseb surya tan nyuarang kulkul lan tan ngamargiang saji pakiriman turmaning kadulurang ngaturang pajati.
 - na. Rikala Ida Bhatara Kahyangan Dēsa ngadeg.
 - ca. Makirim sajeroning tunggal sētra.
 - ra. Tan kalugra mendem siosan ring sētra.
3. Kalugra mendem manut paētangan, inggih punika anak alit sadurung makupak (maketus), patut mapendem pramangkē.
4. Ring sētra kalugrayang makarya undung-undung (gagumuk), sakēwanten mapinget asiku bah bangun, makacihna panumaya miwah parab sang lampus.
5. Kalugra nglangkar watangan risampunē sang lampus ring luanan polih kasiramang banjar, nanging pamargin watangan ring arep lebuḥ sang lampus mangda mamargi ring sisi margi agung, turmaning ring cangkem sētra maduluran antuk ngaturang laba.
6. Pradē wēnten sang maraga madwijati sanē kapalebon, polih genah ring sētra sanē kasinanggeh karang suci.

7. Sahanan sawa polih sētra manut dresta.
8. Pradē wēnten krama siosan dēsa pakraman sanē padem polih sētra manut dresta tur patut nawur pananjung batu manut pararem.

Pawos 55

1. Pradē lampus sangkaning ngulah pati, salah pati, kēngin bakta budal tur kapratēka kadi patut, risampun kamanggala antuk upakara panebusan lan pangulapan.
2. Sawa daha teruna patut nganggē rurub kuning.
3. Pradē wēnten sang istri lampus ngadut manik, tan wenang pendem / geseng sadērēng bobotannya embas, mawastu urip utawi padem.
4. Pradē wēnten wong lampus sanē dērēng mapandes, kēngin kaupacarain mapandes.
5. Pradē kahanan wong lampus ring pakarangan, tegal anak siosan, patut sang madruē sawa ngaturang panyangaskara ring genah inucap.

Pawos 56

Mungguing kacuntakan wēnten kalih soroh :

1. Kacuntakan saking raga sarira :
 - ha. Sebel kandel.
 - na. Cuntaka malarapan antuk maduē oka.
 - ca. Cuntaka malarapan antuk karuron.
 - ra. Cuntaka malarapan antuk pawiwahan durung mabiakaon.
 - ka. Cuntaka malarapan antuk gamia gamana.
 - da. Cuntaka malarapan antuk salah timpal.
 - ta. Cuntaka malarapan antuk bobotan tan kaangkenin.
 - sa. Cuntaka malarapan antuk embas saking bobotan sanē tan kaangkenin.
 - wa. Cuntaka malarapan antuk mitra ngalang.
 - la. Cuntaka malarapan antuk paradara.

2. Kacuntakan saking malarapan sēda.

3. Kekuub kacuntakan :

ha. Sebel kandel : raga sarira, panganggē, pamereman.

na. Cuntaka maduē oka : raga sarira, rabi, paturuan.

ca. Cuntaka karuron : raga sarira, rabi, paturuan.

ra. Cuntaka pawiwahan sanē durung maupakara : raga sarira, paturuan.

ka. Cuntaka gamia gamana : lanang istri, dēsa pakraman.

da. Cuntaka salah timpal : raga sarira, dēsa pakraman.

ta. Cuntaka bobotan sanē tan kaangkenin : raga sarira, panganggē, paturuan.

sa. Cuntaka embas bobotan tan kaangkenin : raga sarira, oka lan paturuan, Dēsa Pakraman.

wa. Cuntaka mitra ngalang : raga sarira, paturuan.

la. Cuntaka sēda : kulawarga ngarep, banjar.

ma. Cuntaka paradara : lanang istri, Dēsa Pakraman.

4. Pawanengan kacuntakan :

ha. Sebel kandel : sakantun ngamedalang rah nyantos mabersih.

na. Cuntaka maduē oka : 42 rahina, saking embas nyantos polih tirta pabersihan, mungguing lanangnyanē nyantos kepus udel.

ca. Cuntaka karuron : sakirang ipun 42 rahina, nyantos polih tirta pabersihan.

ra. Cuntaka pawiwahan sanē durung maupakara : nyantos mabiakaon.

ka. Cuntaka gamia gamana nyantos kapalasang tur kawēntenang pabersihan raga sarira lan dēsa pakraman.

da. Cuntaka salah timpal : nyantos kawēntenang upakara pabersihan miwah pamatut manut dēsa pakraman.

ta. Cuntaka bobotan tan kaangkenin : nyantos upakara pabiakaonan.

- sa. Cuntaka embas saking bobotan tan kaangkenin : 42 rahina maweweh pamrayascita ring Balē Agung.
 - wa. Cuntaka mitra ngalang : nyantos upakara pabiakaonan.
 - la. Cuntaka sēda : nyantos kalaksanayang upacara panyangaskara.
 - ma. Cuntaka paradara : nyantos upakara pabiakaonan.
5. Tan Kalugra :
- ha. Sapasira sanē wēnten ring sajeroning kacuntakan, tan kalugra ngranjing ring genah suci miwah ngambil pakaryan sanē suci.
 - na. Yan wēnten sanē mamurug kacuntakan, patut keni pamidanda pamarisuda.
6. Sanē tan keni kacuntakan malarapan antuk sēda :
- ha. Sang sulinggih.
 - ha. Sang mawang rat : prajuru dēsa.
 - ca. Pamangku Kahyangan Jagat miwah Kahyangan Tiga.
 - ra. Sang tri manggalaning yajnya (sang mayajnya, tukang, sang muput), sasampunē netegang beras.

Pawos 57

Panemayan Pangabēnan kalaksanayang sakirang-kirangnyanē dasa (10) warsa.

Tata sulur pangabēnan miwah pamendeman ring ajeng, maweweh upacara nunas tirta ring Kahyangan Tiga.

Pawos 58

- 1. Atiwa-tiwa (pangabēnan) wēnten 2 soroh :
 - ha. Nyawa resi (nyuasta geni).
 - na. Sawa pratēka.
- 2. Dudonan pangabēnan sakadi ring sor :
 - ha. Ngaskara antuk ngagah utawi nyawa resi.
 - na. Pangutangan antuk ngeseng sawa.
 - ra. Nyekah (mamukur).

3. Saparipolah sanē patut kalaksanayang ring sajeroning ngamargiang upacara upakara tata laksana pangabēnan luiṛē :
 - ha. Tan kalugra ngarap sawa, sanē makrana tan rahayu.
 - na. Mamargi mangda dabdab.

Palet 4

INDIK MANUSA YAJNYA

Pawos 59

1. Manusa yajnya inggih punika upakara dharmaning manusa, ngawit saking patemoning kama petak kalawan kama bang sajeroning garba i biang ngantos mawiwaha.
2. Upakara sakadi ring ajeng madudonan sakadi ring sor :
 - ha. Magedong-gedongan duk pangrempinian i biang (yusa bobotan 6 sasih).
 - na. Duk sang kama rēka wawu medal (sang rarē).
 - ca. Kepus udel.
 - ra. Nglepas haon (risampunē mayusa 12 rahina).
 - ka. Akambuhan (42 rahina).
 - da. Tigang sasih.
 - ta. Pawetuan (6 sasih).
 - sa. Ngempugin (rikala wawu tumbuh untu).
 - wa. Makupak (maketus).
 - la. Mungguh daha teruna (ngraja).
 - ma. Mapandes (matatah).
 - ga. Mawiwaha / madengen-dengen ring pagrahasta.
 - ba. Mawinten nunas panugrahan Sang Hyang Aji Saraswati.
3. Upacara upakara soang-soang ring ajeng nista, madia lan utama manut catur dresta.

INDIK BUTHA YAJNYA

Pawos 60

1. Butha yajnya inggih punika upacara / upakara pabiakalan ring palemahan, parhyangan siosan sarwa prani miwah upakara ring bebuthan.
2. Upacara upakara pabiakalan ring sarwa prani :
 - ha. Tumpek Pangarah / Pangatag : nemoning Saniscara Kliwon Wariga, upakara majeng ring sarwa tanem tuuh.
 - na. Tumpek Andang / Uyē : nemoning Saniscara Kliwon Uyē, upakara majeng ring sarwa ingon-ingon.
 - ca. Upakara pakalan-kalan manusa, manut wiguna, ketah kabawos pabiakalan.
3. Upakara ring palemahan, parhyangan miwah bebuthan, kawastanin macaru.
4. Pacaruan inucap ring ajeng, nista, madia lan utama manut wiguna sakadi ring sor :
 - ha. Ēka sata.
 - na. Panca Sata
 - ca. Panca Kelud.
 - ra. Resi gana.
 - ka. Angkus.
 - da. Miwah sanē siosan.
5. Sajawaning sanē ring ajeng, kawēntenang upakara yajnya sesajēn nyabran wusan nulek.

Pawos 61

1. Pacaruan ha, na, ca, ra, ka miwah sanē siosan, kamargiang olih krama soang-soang manut kawigunannya.
2. Upacara tawur Kasanga kamargiang olih dēsanē :

ha. Majeng ring Ida Bhatara :

- ❖ Panglong ping 13 nglastiang Ida Bhatara ka segara.
- ❖ Rawuh saking melasti Ida Bhatara nyejer ring Balē Agung.

na. Majeng ring bebuthan:

- ❖ Ring Tileming Kasanga, kamargiang pacaruan tawur Kasanga, saha pangrupukan.
- ❖ Bēnjangnyanē kalanturang antuk Nyepi.

3. Upacara rahina Nyepi manut catur brata sakadi ring sor :

ha. Amati Geni.

na. Amati Karya.

ca. Amati Lampah / Lelungan.

ra. Amati Lelanguan.

4. Riwus rahina Nyepi, kawastaninin Ngembak Geni, mapiteges panglukaran yoga semadhi, kadulurin antuk Dharma Shanti sajeroning krama.

PANCAMAS SARGAH

SUKERTA TATA PAWONGAN

Palet 1

INDIK PAWIWAHAN

Pawos 62

1. Pawiwahan inggih punika patemoning purusa lan pradana malarapan antuk panunggalan kayun kapitresnan, maka buatan kasukertan sekala niskala, kadulurin upasaksi sekala miwah niskala.
2. Pamargin pawiwahan wēnten 2 soroh :
 - ha. Pepadikan.
 - na. Ngrorod.

3. Pidabdab sang pacang mawiwaha :
 - ha. Sampun mungguh daha / teruna.
 - na. Sangkaning pada tresna.
 - ca. Mangda manut ring kecaping agama.
 - ra. Pradē pangambilē sios āgama kacihnaang antuk surat pernyataan alih agama saha sudi wadani.
4. Pamargin pawiwahan inucap taler patut nganutin peraturan perundang-undangan sanē kamargiang.

Pawos 63

1. Parabian sanē kapatut ring dēsanē risampun makacihna.
 - ha. Ngamargiang widhi widana, sanistanē pabiakalan.
 - na. Kasaksinin olih Prajuru Dēsa.
2. Mangda kaunggahang ring sejeroning pailikitan.
3. Parabian kabawos tan patut makadi :
 - ha. Natab upakara saking kapaksa.
 - na. Sinalih tunggil tan rawuh.
 - ca. Nēnten wēnten saksi miwah ilikita.
4. Tata cara pamargin parabian :
 - ha. Ngrorod.
 - (1). Saking wit lanang ngwēntenang pangluku ring wit sang istri, sakasēp ipun sarahina.
 - (3). Risampun langkung ring tigang rahina saking wit lanang ngwēntenang pawirasan.
 - (4). Risampun puput pawirasan, wawu kamargiang pabiakalan, kalanturang antuk widhi widana.
 - na. Pepadikan.
 - (1). Saking wit lanang patut rauh numas ring sang madruē wadu, maduluran untuk pakahyun kapitresnan sang pacang marabian makekalih.

- (2). Risampun jangkep pakahyunanē, wawu kalanturang ngambil sang istri, manut dēwasa ayu tur kasarengin, kasaksinin olih prajuru miwah kulawarga wit lanang miwah wit istri.
- (3). Salantur ipun wawu kamargiang upakara pabiakalan manut dresta.
- (4). Yan wēnten sang istri sanē sampun kapadik lampus ring pamargi, sang lanang patut makusara ngupacarain sapatutnyanē, sadērēngē patut nglaksanayang upacara pabiakaonan nganggēn nyāsa.
- (5). Yan wēnten sang istri sasampunē kapadik lampus ring pamargi, sang lanang nēnten kayun nglaksanayang upacara sapatutnē, raris kamargiang olih kulawarga sang istri.

ca. Nyeburin.

(1). Mapadik.

- (ha). Janten wantah wit istri tan wēnten madruē sameton lanang.
- (na). Sang lanang janten sanggup jaga nyentana tur kararemin antuk kulawargannya.
- (ca). Risampun ingkup pakayun sareng kalih [wit lanang miwah istri] wawu kamargiang parabianē, maduluran antuk dēwasa ayu, sang lanang kairing kajeron sang istri.
- (ra). Salantur ipun kamargiang pabiakalan kasaksinin olih prajuru dēsa lan Kelihan Dinas.
- (ka). Risampun puput patut kakaryanin lekita.

(2). Ngrangkat, sakēwanten wadunē pinaka purusa.

Pawos 64

1. Piteges pawiwahanē patut sang lanang marabi adiri, asapunika taler sawaliknya, sajawaning wēnten pasubaya miwah paētangan sios.
2. Pradē wēnten lokika sanggraha patut kasakapang, tur keni pamrayascita ring genah malaksana, yēning sampun wēnten pasadok saking kulawargan ipun.

3. Pradē wēnten dratikrama, paradara, sanē ngranayang cemer jagatē, wenang keni danda upakara panyangaskara manut dudonan.
4. Pradē wēnten gamia gamana lan salah timpal patut keni danda upakara panyangaskara manut dudonan.

Palet 2

INDIK NYAPIAN

Pawos 65

Tata caraning palas marabian :

1. Sulur palas marabian, pradē sinalih tunggil anyasar laku, wirosaning laku matilar tan pasadok, miwah setata wak parusia tan prasida adung malih.
2. Yēning wicaranē katumusang olih lanangē, patut makacihna :
 - ha. Istrinē paradara (mademenan).
 - na. Istrinē amandal sanggama utawi maambulan jantos 6 sasih.
3. Yēning wicaranē katumusang olih wadonē, makacihna :
 - ha. Lanangē dratikrama.
 - na. Wangdu.
 - ca. Tan nyanggamēn saha tan ngupajiwa kalih warsa tan pantara.
 - ra. Mabui lamin ipun limang warsa.
 - ka. Mamunyah.
 - da. Himsa karma.
 - ta. Risajeroning suami istri tan mari matungkas tur mawicara, nyantos tan wēnten apti pacang adung malih risajeroning parabian.
4. Pradē sampun janten sang mawicara ring angka 2, 3 ring ajeng :
 - ha. Parabian kēngin kapalasang.
 - na. Kangkat makta artha brana tetadtadan, saha pahan pagunakaya.

5. Pradē parabianē palas patut :

ha. Pagunakayan polih pahan pada.

na. Tetadtadan kakuasa niri-niri.

ca. Pangweruh miwah pangupajiwa pratisentananē, manut swadharmaning guru rupaka.

ra. Sang maraga purusa patut ngwaliang sang pradana, mapamit ring kawitan sang purusa.

Pawos 66

Pradē riwekas sang palas macihna adung malih patut nglaksanayang pawiwahan malih manut kecap ring ajeng.

Pawos 67

1. Soang-soang balu kabinayang dados :

ha. Balu luh.

na. Balu muani.

2. Swadharmaning balu luh patut :

ha. Nguasayang waris nanging tan kēngin ngadol, ngadēang, makidihang, sajawaning sampun adung ring pianak utawi kulawarga sanē pinih patut, sajaba pah-pahan pagunakaya, miwah arta tetadtadan.

na. Kēngin ngidih sentana, pradē sampun wēnten pidabdab saha kaingkupin olih kulawarga sinanggeh kapurusan.

ca. Kēngin mawiwaha malih.

Pawos 68

1. Balu tan kaucap pageh luiṛē :

ha. Dratikrama, paradara.

na. Matilar saking pakubon tan pasadok.

ca. Lēmpas saking swadharmaning balu.

2. Yēning sampun janten sakadi kecapē ring ajeng, wong balu nyeburin kēngin :
 - ha. Katundung olih kulawarga kapurusan.
 - na. Polih tetadtadan miwah pagunakaya.
3. Pradē balu kaucap pageh, katundung olih kulawarga purusa, kēngin polih pahan pagunakaya miwah arta tetadtadan.

Palet 3

INDIK SENTANA

Pawos 69

1. Mungguing sentana wēnten kalih soroh, luiṛē pratisentana lan sentana peperasan.
2. Pratisentana inggih punika sentana sanē metu saking pawiwahan.
3. Pradē pawiwahan tan ngwetuang sentana, kēngin ngidih sentana antuk upasaksi sekala niskala, puniki kawastanin sentana peperasan.

Pawos 70

1. Ngidih sentana malarapan antuk upacara pamerasan saha makasaksi sekala niskala.
2. Sapasira ugi pacang ngidih sentana, patut masadok ring prajuru dēsa, sadērēng kamargiang upacara pamerasan, sanistane kalih sasih.
3. Prajuru Dēsa patut nyiarang ring sawewidangan dēsanē.
4. Sapasira ugi rumasa tan lila mangda masadok ring prajuru dēsa masengker kalih wuku sadērēng upacara pamerasan.
5. Prajuru Dēsa digelis mawosin saha niwakang pamutus, nepēk ring catur drestanē manut sulur.

Pawos 71

1. Peperasan sanē sinanggeh patut ring Dēsa Pakraman Padangsambian :
 - ha. Sampun ngwēntenang widhi widana pamerasan.
 - na. Kasaksinin olih Prajuru Dēsa lan Dinas, tur kasiarang ring paruman dēsa.

- ca. Wēnten lekita ungguhan tata sulur pamargin pamerasanē lan pamutus saking Guru Wisēsa.
2. Sanē patut kaperas anggēn sentana sakadi ring sor :
- ha. Jadma maagama Hindu.
- na. Pepernahan nedunang saking meras.
- ca. Kulawarga saking purusa, yēning tan wēnten, kēngin saking wadon, pradē taler tan wēnten, wawu kangkat sakama-kama.
- ra. Kēngin ngidih sentana sanē sampun marabian tur sampun madruē pratisentana.
3. Kēngin ngidih sentana kalih diri lanang utawi istri, taler kēngin lanang wadon.

Palet 4

INDIK WARISAN

Pawos 72

Sanē kabawos warisan pradē :

1. Wēnten sang mapiturun (pawaris).
2. Wēnten turunannya (ahliwaris).
3. Wēnten artha brana miwah tetegenan marupa warisan.

Pawos 73

1. Ahliwaris luiṛē :

ha. Pratisentana purusa.

na. Sentana peperasan lanang.
2. Pradē tan wēnten sakadi ring ajeng, kang sinanggeh ahliwaris :

ha. Turunan purusa pernah ngunggahang.

na. Sameton.
3. Pradē tan wēnten [2.ha lan 2.na] kakuasa olih Dēsa Pakraman.

Swadharmaning ahliwaris patut :

1. Nrima saha ngwasayang tetamian, pahan saking kaluhurannya, makadi ngrempon sanggah, pura, saha pangupacarannya, miwah nylediin ayah-ayahan pawaris.
2. Ngabenang pawaris saha nglanturang upakara ring pitra.
3. Naur utang pawaris.

Pangepahan warisan manut sakadi ring sor :

1. Risampun kalaksanayang pitra yajnya lan utang-utang buntas kataur.
2. Para ahliwaris polih pahan pada.
3. Sinalih tunggih ahliwaris ring ajeng, tan polih pahan waris pradē sentana rajeg kēsah mawiwaha, miwah pratisentana nyeburin soang-soang kabaos ninggal kadaton miwah agama.
4. Pradē boya ahliwaris, kengin muponin kēwanten manut dudonan :
 - ha. Sentana luh salami durung kēsah mawiwaha, pradē logika sanggraha, mawastu madruē pianak, pianak inucap kengin ngwaris pagunakayan biangē kēwanten.
 - na. - Balu luh saha balu muani nyeburin.
 - ca. Mulih daha utawi teruna, riantukan ring pawiwahan pecak, sampun ninggal kadaton.
5. Pawaris kengin mapaweweh rikala maurip pinaka :
 - ha. Jiwa dana, tetadtadan, maka cihna paweweh ring i pianak sanē kēsah mawiwaha.
 - na. Pangupajiwa paweweh padgata kala, maka pamupon hasil kēmaon.
 - ca. Pedum pangamong [pedum raksa], pahan waris padgatakala, ngantos pedum jenek saking pawaris arep, ring ahliwaris.

1. Pradē sajeroning pakulawargan wēnten ahliwaris langkungan ring adiri patut :
 - ha. Kawēntenang paigum indik pedum waris inucap.
 - na. Yan tan prasida, wenang katunasang tetimbang ring Prajuru Dēsa.
 - ca. Pradē tan wēnten cumpu ring panepas Prajuru Dēsa, kēngin numusang ring sang rumawos.
2. Pradē wēnten karang bukti pura, wenang Prajuru Dēsa mawosin tur niwakang :
 - ha. Ahliwaris saking purusa.
 - na. Pepernahan ngunggahang.
 - ca. Sameton.

SASTHAS SARGAH
WICARA LAN PAMIDANDA

Palet 1

INDIK WICARA

Pawos 77

1. Sanē wenang mawosin makadi mutusang wicara krama dēsa pakraman luiṛē :
 - ha. Kelihan Banjar.
 - na. Bandēsa.
2. Pradē sang mawicara tan wēnten cumpu ring pamutus Kelihan Banjar, kēngin nunas bawos ring Bandēsa.
3. Pradē taler tan wēnten cumpu ring pamutus Bandēsa kēngin numusang ring sang rumawos.

Pawos 78

1. Sahanan wicara sanē mawiwit kacorahan sakaluirē, miwah sinanggeh nungkasin daging awig-awig, paswara miwah pararem, patut pramangkin kabawosin tan nyantos pasadok.
2. Sajaba wicara kadi ring ajeng, patut nyantosang pasadok sang nunas bawos.
3. Panepasē mangda pastika nyantenang iwang patut, malarapan Tri Pramana [saksi, bukti, ilikita] saha tan maren nepēk ring Catur Dresta.

INDIK PAMIDANDA

Pawos 79

1. Dēsa / Banjar wenang niwakang pamidanda ring warga dēsa sanē sisip.
2. Tetiwak inucap kalaksanayang olih Bandēsa utawi Kelihan Banjar, nunggal-nunggal manut dudonan.
3. Ageng alit pamidanda masor singgih manut kasisipan, tan maren ngupadi dharma kawelas arsan.
4. Bacakan pamidandanē luiṛē :
 - ha. Danda artha miwah panikel-panikelnya.
 - na. Pangampura (nyuaka).
 - ca. Upakara panyangaskaran.
5. Jinah utawi artha brana pamidanda ngranjing druēn Dēsa / Banjar.

Pawos 80

1. Rikala ngamedalang jinah pepeson, urunan, dedandan, yēning celed ring pawanengan sangkep (parum), keni pamidanda nikel.
2. Risampun keni nikel, mawaneng malih kalih pasangkepan taler tan katawur, inawastu jadma inucap tan manut ring sadaging awig-awig, paswara miwah pararem dēsa / banjar, wenang kararyanang dados krama salami dērēng buntas waneng pamidanda ipun.

SAPTAMAS SARGAH

NGUWAH-NGUWUHN AWIG-AWIG

Pawos 81

1. Nguwah-nguwuhin awig-awig Dēsa Pakraman Padangsambian puniki kalaksanayang olih Majelis Paruman Krama Dēsa Pakraman Padangsambian.
2. Paruman inucap mangda kadasarin antuk pakarsan Krama Dēsa.

3. Pamutus bawos mangda kadasarin antuk gilik saguluk, bilih tan prasida, suara makwēhan pinaka pamutus.

Pawos 82

1. Sakaluir sanē wēnten saderengnya, patut anutang ring sadaging awig-awig puniki.
2. Sakaluir sanē durung kabawos sajeroning awig-awig puniki, patut kalaksanayang manut tata cara sanē sampun ketah mamargi.
3. Sasampun awig-awig Dēsa Pakraman Padangsambian puniki lumaksana, daging awig-awig Dēsa Pakraman Padangsambian sanē kamanggehang ring tanggal 2 Mēi 2004, sanē-tan manut ring daging awig-awig dēsa pakraman puniki, tan lumaksana malih.

Pawos 83

Paruman indik nguwah-nguwuhin awig-awig sakadi ring ajeng, patut kasiarang olih Bandēsa lan Kelihan Banjar.

ASTAMAS SARGAH SAMAPTA

Pawos 84

1. Awig-awig puniki kawastanin Awig-Awig Dēsa Pakraman Padangsambian.
2. Awig-awig puniki kamargiang ngawit saking kararemin.

Pawos 85

1. Awig-awig puniki kararemin ring :
Rahina : Saniscara Paing.
Wuku : Merakih.
Sasih : Kaulu.
Pananggal : ping Kalih.

Tahun Icaka : 1928.

Tanggal Masehi : 20 Januari 2007.

2. Awig-awig puniki kalingga tanganin olih Kelihan Majelis Paruman Krama lan Bandesa, kasaksinin olih Lurah Padangsambian, Kepala Desa Padangsambian Kaja, Kepala Desa Padangsambian Kelod, Camat Dēnpasar Barat miwah Walikota Dēnpasar.

Padangsambian, 20 Januari 2007

Kelihan Majelis Paruman Krama

Desa Pakraman Padangsambian,

Bandesa
Desa Pakraman Padangsambian,

A. Putu Gedē Suwira

Desa Pakraman Padangsambian,

A. Madē Sujana

Kasaksinin olih,

Kepala Desa Padangsambian Kaja,

A.A. Kompyang Sukarta Wirawan

Kepala Desa Padangsambian Kelod,

I Madē Sutarka

Kepala Kelurahan Padangsambian

Dēndē Sudin

Walikota Dēnpasar

Puspayoga

Camat Dēnpasar Barat

Drs I Madē Mudra, Msi

Awig-Awig Desa Pakraman Padangsambian

widang-39

PAMUPUT

OM Suastiastu.

Puput sinurat ring rahina Raditē Pon, wuku Tambir sasih Kaulu.

Kasurat olih

A.A. Ketut Suidana

(Panyarikan Majelis Paruman Krama Dēsa Pakraman Padangsambian).

Warakṣamākena, Wirūpaning Akṣara, Bapkawenang.

OM Āyur Wredhi Yaśa Wreddhi, Wredhi Prajña Sukha śriyaṃ.

Dharma Santana Wredhiśca, Santu tē Sapta Wredhayah.

OM Ātmā Tattwātmā Śuddhamāṃ Swāhā.

OM kṣama Sampurna Swāhā.

Aṃ Uṃ Maṃ Wēta Urip.